


75238.07/0623



文編卷之八目錄

封事

劉更生條災異封事

劉向極諫外家封事

王嘉論董賢封事

王嘉再論董賢封事

何武薦辛慶忌封事

哈佛大學哈佛燕京
圖書館珍藏印



文編卷之八 封事

荆川 武進唐順之應德甫 選批
門人 丹陽姜 寶 廷善 編次
知福州府墊江胡 帛 子行 校刊

此文最
有法度

劉更生條災異封事

引書

臣前幸得以骨肉備九卿奉法不謹乃復蒙恩竊見
災異並起天地失常徵表爲國欲終不言念忠臣雖
在眇畝猶不忘君惓惓之義也况重以骨肉之親又
加以舊恩未報乎欲竭愚誠又恐越職然惟二恩未
報忠臣之義一攄愚意退就農畝死無所恨臣聞舜

命九官濟濟相讓和之至也衆賢和於朝則萬物和
於野故簫韶九成而鳳皇來儀擊石拊石百獸率舞
四海之內靡不和寧及至周和文開基西郊雜遯衆賢
罔不肅和崇推讓之風以銷分爭之訟文王旣沒周
公思慕歌詠文王之德其詩曰於穆清廟肅雍顯相
濟濟多士秉文之德當此之時武王周公繼政朝臣
和於內萬國驩於外故盡得其驩心引詩書者皆指法此体以事其先祖其
詩曰有來雍雍至止肅肅相維辟公天子穆穆言四
方皆以和來也諸侯和於下天應報於上故周頌曰
降福穰穰又曰飴我釐麩釐麩麥也始自天降此皆

以和致和獲天助也不和下至幽厲之際朝廷不和轉相
非怨詩人疾而憂之曰民之無良相怨一方衆小在
位而從邪議歛歛相是而背君子故其詩曰歛歛訛
訛亦孔之哀謀之旣臧則具是違謀之不臧則具是
依君子獨處守正不撓衆枉勉疆以從王事則反見
憎毒讒慝故其詩曰密勿從事不敢告勞無罪無辜
讒口瞽瞍當是之時日月薄蝕而無光其詩曰朔日
辛卯日有蝕之亦孔之醜又曰彼月而微今此下民
亦孔之哀又曰日月鞠凶不用其行四國無政不用
其良天變見於上地變動於下水泉沸騰山谷易處

其詩曰百川沸騰山冢卒崩高岸爲谷深谷爲陵哀
今之人胡惜莫徵霜降失節不以其時其詩曰正月
繁霜我心憂傷民之訛言亦孔之將言民以是爲非
甚衆大也此皆不和賢不肖易位之所致也自此之
後天下大亂篡殺殃禍並作厲王奔彘幽王見殺至
乎平王末年魯隱之始即位也周大夫祭伯乖離不
和出奔於魯而春秋爲諱不言來奔傷其禍殃自此
始也是後尹氏世卿而專恣諸侯背畔而不朝周室
卑微二百四十二年之間日食三十六地叙得錯綜震五山陵
崩隄二彗星三見夜常星不見夜中星隕如雨一火

災十四長狄入三國五石隕墜六鷁退飛多麋有蜮
蜚鸚鵡來巢者皆一見晝冥晦雨水冰李梅冬實七
月霜降草木不死八月殺菽大雨雹雨雪雷霆失序
相乘水旱饑螽蝻螟螽午並起當是時禍亂輒應弒
君三十六亡國五十二諸侯奔走不得保其社稷者
不可勝數也周室多禍晉敗其師於貿戎伐其郊鄭
傷桓王戎執其使衛侯朔召不往齊逆而助朔五大
夫爭權三君更立莫能正理遂至陵夷不能復興由
此觀之結和氣致祥乖氣致異祥多者其國安異衆者
其國危天地之常經古今之通義也今陛下開三代

之業招文學之士優游寬容使得並進今賢不肖渾
淆白黑不分邪正雜揉忠讒並進章交公車人滿北
軍朝臣舛午膠戾乖刺更相讒謔轉相是非傳授增
加文書紛糾前後錯謬毀譽混亂所以營惑耳目感
移心意不可勝載分曹為黨往往羣朋將同心以陷
此後說得最反覆正臣正臣進者治之表也正臣陷者亂之機也乘治
亂之機未知孰任而災異數見此臣所以寒心者也
夫乘權藉勢之人子弟鱗集於朝羽翼陰附者衆輻
輳於前毀譽將必用以終乖離之咎是以日月無光
雪霜夏隕海水沸出吐谷易處列星失行皆怨氣之

所致也夫遵衰周之軌迹循詩人之所刺而欲以成
太平致雅頌猶却行而求及前人也初元以來六年
矣按春秋六年之中災異未有稠如今者也夫有春
秋之異無孔子之救猶不能解紛况甚於春秋乎原
其所以然者讒邪並進也讒邪之所以並進者由上
多疑心既已用賢人而行善政如或譖之則賢人退
而善政還夫執狐疑之心者來讒賊之口醇雅之文持不斷之
意者開群枉之門讒邪進則衆賢退群枉盛則正士
消故易有否泰小人道長君子道消君子道消則政
日亂故為否否者閉而亂也君子道長小人道消小

人道消則政日治故爲泰泰者通而治也詩又云雨
雪庶庶見覲聿消與易同義昔者鯀共工驩兜與舜
禹雜處堯朝周公與管蔡並居周位當是時迭進相
毀流言相謗豈可勝道哉帝堯成王能賢舜禹周公
而消共工管蔡故以大治榮華至今孔子與季孟偕
仕於魯李斯與叔孫俱宦於秦定公始皇賢季孟李
斯而消孔子叔孫故以大亂污辱至今故治亂榮辱
之端在所信任信任既賢在於堅固而不移詩云我
心匪石不可轉也言守善篤也易曰渙汗其大號言
號令如汗汗出而不反者也今出善令未能踰時而

反是反汗也用賢未能三旬而退是轉石也論語曰
見不善如探湯今二府奏佞調不當在位歷年而不
去故出令則如反汗用賢則如轉石去佞則如拔山
如此望陰陽之調不亦難乎是以群小窺見間隙緣
飾文字巧言醜詆流言飛文譁於民間故詩云憂心
悄悄愠于羣小小人成羣誠足愠也昔孔子與顏淵
子夏更相稱譽不爲朋黨禹稷與臯陶傳相汲引不
爲比周何則忠於爲國無邪心也故賢人在上位則
引其類而聚之於朝易曰飛龍在天大人聚也在下
位則思與其類俱進易曰拔茅茹以其彙征吉在上

則引其類在下則推其類故湯用伊尹不仁者遠而
 衆賢至類相致也今又說佞邪與賢臣並交戟之內合黨
 共謀違善依惡歛歛訛訛數設危險之言欲以傾移
 主上如忽然用之此天地之所以先戒災異之所以
 重至者也自古明聖未有無誅而治者也故舜有四
 放之罰而孔子有兩觀之誅然後聖化可得而行也
 今以陛下明知誠深思天地之心迹察兩觀之誅覽
 否泰之卦觀雨雪之詩歷周唐之所進以為法原秦
 魯之所消以為戒考祥應之福省災異之禍以揆當
 世之變放遠佞邪之黨壞散險詖之聚杜閉群枉之
 門廣開衆正之路決斷狐疑分別猶豫使是非炳然
 可知則百異消滅而衆祥並至太平之基萬世之利
 也臣幸得託肺腑誠見陰陽不調不敢不通所聞竊
 推春秋災異以救今事一二條其所以不宜宣泄更
 生重封昧死上

此等文字為忠誠第一

劉向極諫外家封事

臣聞人君莫不欲安然而常危莫不欲存然而常亡
 失御臣之術也夫大臣操權柄持國政未有不為害
 者也昔晉有六卿齊有田崔衛有孫甯魯有季孟常
 掌國事世執朝柄終後田氏取齊六卿分晉崔杼弑

其君光孫林父甯殖出其君衍弑其君剽季氏八佾舞於庭三家者以雍徹並專國政卒逐昭公周大夫尹氏筦朝事濁亂王室子朝子猛更立連年乃定故經曰王室亂又曰尹氏殺王子克甚之也春秋舉成敗錄禍福如此類甚衆皆陰盛而陽微下失臣道之所致也故書曰臣之有作威作福害于而家凶于而國孔子曰祿去公室政逮大夫危亡之兆秦昭王舅穰侯及涇陽葉陽君專國擅勢上假太后之威三人者權重於昭王家富於秦國國甚危殆賴寤范雎之言而秦復存二世委任趙高專權自恣壅蔽大臣終

有閹樂望夷之禍秦遂以亡近事不遠即漢所代也漢興諸呂無道擅相尊主呂產呂祿席太后之寵擬將相之位兼南北軍之衆擁梁趙王之尊驕盈無厭欲危劉氏賴忠正大臣絳侯朱虛侯等竭誠盡節以誅滅之然後劉氏復安今王氏一姓乘朱輪華轂者二十三人青紫貂蟬充盈幄內魚鱗左右大將軍秉事用權五侯驕奢僭盛並作威福擊斷自恣行汙而寄治身私而託公依東宮之尊假甥舅之親以為威重尚書九卿州牧郡守皆出其門筦執樞機朋黨比周稱譽者登進忤恨者誅傷游談者助之說執政者

論得激切

曲盡王氏所以篡漢之故

爲之言排擯宗室孤弱公族其有智能者充非毀而
不進遠絕宗室之任不令得給事朝者恐其與已分
權數稱燕王蓋主以疑上心避諱呂在而弗肯稱內
有管蔡之萌外假周公之論兄弟據至宗室磐互歷
上古至於秦漢外戚僭貴未有如王氏者也雖周皇
甫秦穰侯漢武安呂霍上官之屬皆不及也物盛必
有非常之變先見爲其人徵象孝昭帝時冠石立於
泰山仆柳起於上林而孝宣帝即位今王氏先祖墳
墓在濟南者其梓柱生枝葉扶疏上出屋根墜地中
雖立石起柳無以過此之明也事勢不兩大王氏與

忠憤之論讀之尚可為流涕

劉氏亦且不並立如下有泰山之安則上有累卵之
危陛下爲人子孫守持宗廟而令國祚移於外親降
爲皂隸縱不爲身宗廟何婦人內夫家外父母家
此亦非皇太后之福也孝宣皇帝不與舅平昌侯權
所以全安之也夫明者起禍於無形銷患於未然宜
發明詔吐德音接近宗室親而納信黜遠外戚母授
以政皆罷令就第以則效先帝之所行厚安外戚全
其宗族誠東宮之意外家之福也王氏永存保其爵
祿劉氏長安不失社稷所以保睦外內之姓子子孫
孫無疆之計也如不行此策田氏復見於今六卿必

不特為漢忠謀雖為王氏忠謀者亦無以喻于向矣

起於漢爲後嗣憂昭昭甚明不可不深圖不可不蚤慮易曰君不密則失臣臣不密則失身幾事不密則害成惟陛下深留聖思審固幾密覽往事之戒以折中取信居萬安之實用保宗廟久承皇太后天下幸甚

質直

王嘉論董賢封事

臣聞咎繇戒帝舜曰亡教佚欲有國兢兢業業一日二日萬機箕子戒武王曰臣無有作威作福亡有玉食臣之有作威作福玉食害于而家凶于而國人用側頗辟民用僭慝言如此則逆尊卑之序亂陰陽之

統而害及王者其國極危國人傾仄不正民用僭差不一此君不由法度上下失序之敗也武王躬履此道隆至成康自是以後縱心恣欲法度陵遲至於臣弑君子弑父父子至親失禮患生何況異姓之臣孔子曰道千乘之國敬事而信節用而愛人使民以時孝文皇帝備行此道海內蒙恩爲漢太宗孝宣皇帝賞罰信明施與有節記人之功忽於小過以致治平孝元皇帝奉承大業溫恭少欲都內錢四十萬萬水衡錢二十五萬萬少府錢十八萬萬嘗幸上林後宮馮貴人從臨獸圈猛獸驚出貴人前當之元帝嘉美

其義賜錢五萬掖庭見親有加賞賜屬其人勿衆謝
示平惡偏重失人心賞賜節約是時外戚貲十萬者
少耳故少府水衡見錢多也雖遭初元末光凶三饑
饑加有西羌之變外奉師旅內振貧民終無傾危之
憂以府藏內充實也孝成皇帝時諫臣多言燕出之
害及女寵專愛耽於酒色損德傷年其言甚切然終
不然怒也罷臣淳于長張放史育育數貶退家貲不
滿千萬放斥逐就國長榜死於獄不以私愛害公義
故雖多內譏朝廷安平傳業陛下陛下在國之時好
詩書上儉節徵來所過道上稱誦德美此天下所以

回心也初即位易帷帳去綿繡乘輿席緣締繒而已
共皇寢廟比比當作愛閔元元惟用度不足以義割
恩輒且止息今始作治而駙馬都尉董賢亦起官寺
上林中又爲賢治大第開門鄉北闕引王渠灌園池
使者護作賞賜吏卒甚於治宗廟賢母病長安厨給
祠具道中過者皆飲食爲賢治噐噐成奏御迺行或
物好特賜其工自貢獻宗廟三宮猶不至此賢家有
賓婚及見親諸官並共賜及舍頭奴婢人十萬錢使
者護視發取市物百賈震動道路謹譁群臣惶惑詔
書罷苑而以賜賢二千餘頃均田之制從此墮壞奢

文編卷之八
一卦事
十
僭放縱變亂陰陽災異衆多百姓訛言持籌相驚被
髮徒跣而走乘馬者馳天或其意不能自止或以爲
籌者人失之戒也陛下素仁智慎事今而有此大譏
孔子曰危而不持顛而不扶則將焉用彼相矣臣嘉
幸得備位竊內悲傷不能通愚忠之信身死有益於
國不敢自惜惟陛下慎已之所獨鄉察衆人之所共
疑往者寵臣鄧通韓嫣驕貴失度逸豫無厭小人不
勝情欲卒陷罪辜亂國亡軀不終其祿所謂愛之適
足以害之者也宜深覽前世以節賢寵全安其命

王嘉再論董賢封事

臣聞爵祿土地天之有也書云天命有德五服五章
哉王者代天爵人尤宜慎之裂地而封不得其宜則
衆庶不服感動陰陽其害疾自深令聖體久不平此
臣嘉所內懼也高安侯賢倭幸之臣陛下傾爵位以
貴之殫貨財以富之損至尊以寵之主威以黜府藏
已竭惟恐不足財皆民力所爲孝文皇帝欲起露臺
重百金之費克已不作今賢散公賦以施私惠一家
至受千金徃古以來貴臣未嘗有此流聞四方皆同
怨之里諺曰千人所指無病而死臣常爲之寒心今
太皇太后以來信太后遺詔詔丞相御史益賢戶賜

三侯國臣嘉竊惑山崩地動日食於三朝皆陰侵陽之戒也前賢已再封晏商再增田業緣私橫求恩已過厚求索自恣不知厭足甚傷尊尊之義不可以示天下爲害痛矣臣驕侵罔陰陽失節氣感相動害及身體陛下寢疾久不平繼嗣未立宜思正萬事順天入之心以求福祐柰何輕身肆意不念高祖之勤苦垂立制度欲傳之於無窮哉孝經曰天子有爭臣七人雖無道不失其天下臣謹封上詔書不敢露見非愛死而不自法恐天下聞之故不敢自劾愚戇數犯忌諱惟陛下省察

何武薦辛慶忌封事

虞有呂之竒晉獻不寐衛青在位淮南寢謀故賢人立朝折衝厭難勝於亡形司馬法曰天下雖安忘戰必危夫將不豫設則亡以應卒士不素厲則難使死敵是以先帝建列將之官近戚主內異姓距外故姦軌不得萌動而破滅誠萬世之長策也光祿勳慶忌行義脩正柔敏敦厚謀慮深遠前在邊郡數破敵獲虜外夷莫不聞廼者大異並見未有其應加以兵革久寢春秋大災未至而豫禦之慶忌宜在爪牙官以備不虞

閩縣儒學訓導陳桐校
書院生 員李道亨重校

文編卷之八終

文編卷之九目錄

表

諸葛亮出師表

再出師表

韓愈論佛骨表

王安石賀冬表

王安石賀正表

蘇軾徐州賀河平表

王安石賀南郊禮畢肆赦表一

王安石賀南郊禮畢肆赦表二

王安石賀景靈宮奉安列聖御容表

蘇軾賀立皇后表

王安石賀周德妃及魏國大長公主禮成表

蘇軾賀駕幸太學表

歐陽修賀平貝州表

王安石進修南郊勅式表

王安石請 皇帝御正殿復常膳表

第二表

王安石辭南郊陪位表

王安石辭明堂陪位表

李密陳情表

歐陽修乞罷政事表

王安石乞罷政事第二表

歐陽修亳州乞致仕第二表

歐陽修蔡州乞致仕第二表

歐陽修蔡州乞致仕第三表

王安石乞退第一表

王安石乞退第三表

王安石乞宮觀表

王安石謝詔免南郊陪位表

歐陽修謝明堂覃恩轉官表

王安石謝加食邑表一

王安石謝加食邑表二

王安石謝遷入東府賜御筵表

王安石謝朱炎傳聖旨令視事表

歐陽修謝復龍圖閣直學士表

歐陽修謝宣召入翰林表

蘇軾謝宣召入院表

蘇軾謝除侍讀表

王安石謝知制誥表

蘇軾謝復官提舉士局觀表

歐陽修南京留守謝上表

歐陽修亳州謝上表

王安石江寧府謝上表

王安石謝賜第安國及第表

王安石謝男雱除中允說書表

蘇軾謝賜曆日表

曾鞏謝元豐元年曆日表

歐陽修謝賜漢書表

蘇軾謝賜對衣金帶馬表

王安石謝賜對衣鞍馬表

歐陽修謝擅止散青苗錢放罪表

蘇軾謝失覺察妖賊放罪表

蘇軾杭州謝放罪表

又謝太皇太后表

文編卷之九 表

荆川 武進唐順之應德甫 選批

門人 丹陽姜寶廷 善 編次

知福州府塾江湖 帛子 行 校刊

諸葛亮出師表

臣亮言先帝創業未半而中道崩殂今天下三分益州疲敝此誠危急存亡之秋也然侍衛之臣不懈於內忠志之士忘身於外者蓋追先帝之遇欲報之於陛下也誠宜開張聖聽以光先帝遺德恢弘志士之氣不宜妄自菲薄引喻失義以塞忠諫之路也宮中

府中俱爲一體陟罰臧否不宜異同若有作姦犯科及爲忠善者宜付有司論其刑賞以昭陛下平明之治不宜偏私使內外異法也侍中侍郎郭攸之費禕董允等此皆良實志慮忠純是以先帝簡拔以遺陛下愚以爲宮中之事事無大小悉以咨之然後施行必能裨補闕漏有所廣益將軍向寵性行淑均曉暢軍事試用於昔日先帝稱之曰能是以衆議舉寵以爲督愚謂營中之事悉以諮之必能使行陣和穆優劣得所也親賢臣遠小人此先漢所以興隆也親小人遠賢士此後漢所以傾頽也先帝在時每與臣論此事未嘗不歎息痛恨於桓靈也侍中尚書長史叅軍此悉貞亮死節之臣也願陛下親之信之則漢室之隆可計日而待也臣本布衣躬耕於南陽苟全性命於亂世不求聞達於諸侯先帝不以臣卑鄙猥自枉屈三顧臣於草廬之中諮臣以當世之事由是感激遂許先帝以驅馳後值傾覆受任於敗軍之際奉命於危難之間爾來二十有一年矣先帝知臣謹慎故臨崩寄臣以大事也受命以來夙夜憂勤恐託付不效以傷先帝之明故五月渡瀘深入不毛今南方已定甲兵已足當獎率三軍北定中原庶竭駑鈍攘

文編卷之九
表
除姦凶興復漢室還于舊都此臣之所以報先帝而忠陛下之職分也至於斟酌損益進忠盡言則攸之禕允之任也願陛下託臣以討賊興復之效不效則治臣之罪以告先帝之靈責攸之禕允等之咎以彰其慢陛下亦宜自謀以咨諏善道察納雅言深追先帝遺詔臣不勝受恩感激今當遠離臨表泣涕不知所云

再出師表

先帝深慮以漢賊不兩立王業不偏安故託臣以討賊以先帝之明量臣之才固當知臣伐賊才弱敵彊然不伐賊王業亦亡惟坐而待亡孰與伐之是故託臣而弗疑也臣受命之日寢不安席食不甘味思惟北征宜先入南故五月渡瀘深入不毛臣非不自惜也顧王業不可偏安於蜀都故冒危難以奉先帝之遺意也而議者謂爲非計今賊適疲於西又務於東兵法乘勞此進趨之時也謹陳其事如左高帝明並日月謀臣淵深然涉險被創危然後安今陛下未及高帝謀臣不如良平而欲以長計取勝坐定天下此臣之未解一也劉繇王朗各據州郡論安言計動引聖人群疑滿腹衆難塞曾今歲不戰明年不征使孫

策坐大遂并江東此臣之未解二也曹操智計殊絕
於人其用兵也髣髴孫吳然困於南陽險於烏巢危
於祁連偏於黎陽幾敗伯山殆死潼關然後偽定一
時耳况臣才弱而欲以不危定之此臣之未解三也
曹操五攻昌霸不下四越巢湖不成任用李服而李
服圖之委夏侯而夏侯敗亡先帝每稱操為能猶有
此失况臣駑下何能必勝此臣之未解四也自臣到
漢中中間朞年耳然喪趙雲陽群馬王閭芝丁立白
壽劉劭鄧銅等及曲長屯將七十餘人突將無前竇
叟青羌散騎武騎千餘人皆數十年之內所糾合四
方之精銳非一州之所有若復數年則損三分之二
當何以圖敵此臣之未解五也今民窮兵疲而事不
可息事不可息則住與行勞費正等而不及蚤圖之
欲以一州之地與賊支久此臣之未解六也夫難平
者事也昔先帝敗軍於楚當此時曹操拊手謂天下
已定然後先帝東連吳越西取巴蜀舉兵北征夏侯
授首此操之失計而漢事將成也然後吳更違盟關
羽毀敗穉歸蹉跌曹丕稱帝凡事如是難可逆見臣
鞠躬盡力死而後已至於成敗利鈍非臣之明所能
逆覩也

韓愈論佛骨表

臣某言伏以佛者夷狄之一法耳自後漢時流入中國上古未嘗有也昔者黃帝在位百年年百一十歲少昊在位八十年年百歲顓頊在位七十九年年九十八歲帝嚳在位七十年年百五歲帝堯在位九十八年年百一十八歲帝舜及禹年皆百歲此時天下太平百姓安樂壽考然而中國未有佛也其後殷湯亦年百歲湯孫太戊在位七十五年武丁在位五十九年書史不言其年壽所極推其年數蓋亦俱不減百歲周文王年九十七歲武王年九十三歲穆王在

位百年此時佛法亦未入中國非因事佛而致然也漢明帝時始有佛法明帝在位纔十八年耳其後亂亡相繼運祚不長宋齊梁陳元魏以下事佛漸謹年代尤促惟梁武帝在位四十八年前後三度捨身施佛宗廟之祭不用牲牢晝日一食止於菜果其後竟爲侯景所逼餓死臺城國亦尋滅事佛求福乃更得禍由此觀之佛不足事亦可知矣高祖始受隋禪則議除之當時群臣材識不遠不能深知先王之道古今之宜推闡聖明以救斯弊其事遂止臣常恨焉伏惟睿聖文武皇帝陛下神聖英武數千百年已來未

有倫比卽位之初卽不許度人爲僧尼道士又不許
創立寺觀臣常以爲高祖之志必行於陛下之手今
縱未能卽行豈可恣之轉令盛也今聞陛下令群僧
迎佛骨於鳳翔御樓以觀昇入大內又令諸寺迓迎
供養臣雖至愚必知陛下不惑於佛作此崇奉以祈
福祥也直以年豐人樂徇人之心爲京都士庶設詭
異之觀戲玩之具耳安有聖明若此而肯信此等事
哉然百姓愚冥易惑難曉苟見陛下如此將謂真心
事佛皆云天子大聖猶一心敬信百姓何人豈合更
惜身命焚頂燒指百十爲群解衣散錢自朝至暮轉

相倣效惟恐後時老少奔波棄其業次若不卽加禁
遏更歷諸寺必有斷臂鬻身以爲供養者傷風敗俗
傳笑四方非細事也夫佛本夷狄之人與中國言語
不通衣服殊製口不言先王之法言身不服先王之
法服不知君臣之義父子之情假如其身至今尚在
奉其國命來朝京師陛下容而接之不過宣政一見
禮賓一設賜衣一襲衛而出之於境不令惑衆也况
其身死已久枯朽之骨凶穢之餘豈宜令入宮禁孔
子曰敬鬼神而遠之古之諸侯行弔於其國尚令巫
祝先以桃茢祓除不祥然後進弔今無故取朽穢之

物親臨觀之巫祝不先桃茢不用群臣不言其非御
史不舉其失臣實恥之乞以此骨付之有司投諸水
火永絕根本斷天下之疑絕後代之惑使天下之人
知大聖人之所作爲出於尋常萬萬也豈不盛哉豈
不快哉佛如有靈能作禍崇凡有殃咎宜加臣身上
天鑒臨臣不怨悔無任感激懇悃之至謹奉表以聞
臣某誠惶誠恐

王安石賀冬表

陰借物極陽與朋來推歷玩占乃見潛萌之信體元
御辨以知敦復之中恭惟 皇帝陛下舜孝禹功文
謨武烈茂對時之福燬靈承旅以壽康臣又冒朝榮
外叨方任弗與稱觴之末豈勝存闕之深

王安石賀正表

寶歷無疆嘉生有俶門憲始和之象庭充元會之儀
伏惟 皇帝陛下膺保永圖茂綏純嘏撫五辰而致
順毓萬物以皆昌臣又負異恩尚嬰衰疾瞻雲煥爛
欣逢舜旦之華擊壤逍遙樂得夏時之正

蘇軾徐州賀河平表

聖謨獨運天眷莫違庶邦子來民罔告病萬杵雷動
役不逾時遂消東北莫大之憂然後麥禾可得而食

文編卷之九
人無後患喜若再生伏以大河爲災歷世所病禹治
兗州之野十有三載乃同漢築宣房之宮二十餘年
而定未有收狂瀾於既潰復故道於將堙俛仰而成
神速若此恭惟 皇帝陛下至仁博施神智無方達
四聰以來衆言廣大孝以安宗廟水當潤下河不溢
流屬歲乂之無虞故患生於所忽方其決也本吏失
其防而非天意及其復也蓋天助有德而非人功振
古所無溥天同慶維豐沛之大澤實汴泗之所鍾伊
昔橫流凜孤城之若塊迨茲平定蔚秋稼以如雲害
既廣則利多憂獨深而喜倍雖官守有限不獲趨外
庭以稱觴而民意所同亦能抒下情而作頌

王安石賀南郊禮畢肆赦表一

精意上昭神靈底豫茂恩旁暢夷夏接和臣聞道以
饗帝爲難禮以配天爲至有秩斯祐唯四表之歡心
胡臭亶時匪九州之美味自古在昔若聖與仁厥遭
昌辰乃覩熙事恭惟 皇帝陛下邁種三德敷奏九
功率額奉璋之衆髦肇稱奠璧之新禮廟籩致孝郊
血告幽誠既格於穹旻福遂均於品庶振憂矜寡原
宥青莪第五王以褒封善人是富發三錢而慶賜賤
者不虛天其居歆人以呼舞臣夙叨寵獎親值休成

文編卷之九 表
雖無預於駿奔實不勝於竊抃

王安石賀南郊禮畢肆赦表二

精明條達神睠顧而依懷膏澤川流人歡呼而蹈厲
臣聞語孝之至莫大於配天議禮而輕不足以享帝
能舉釐事實歸聖時恭惟 皇帝陛下鴻化已昭康
年屢應奔走籩豆有董正之治官絜豐粢盛有底慎
之財賦禮成穀旦恩浹縣區雖洛誦之休明尚難譬
稱豈兒寬之淺訥能盡揄揚臣夙荷慈憐方嬰衰瘵
望九賓之紳笏獨遠句傳狎百獸於山林猶知率舞

王安石賀景靈宮奉安列聖御容表

新一代之上儀極二端之美報經始有倣實自睿謀
歡成無疆乃惟衆志竊以闕宮鬼享周特興於姜嫄
原廟神游漢獨降於高帝遠或遺祖近止及親恭惟
皇帝陛下服卑而即功食菲以致孝嚴祖宗之衆像
依仙釋而異宮館御因時初豈忘於苟簡修除備物
乃有待於純熙宸宇秘嚴扁榜崇麗裸獻式序妥侑
維時藐然徃初孰此倫擬臣父尸榮祿尚負宿痾聞
釐事之既成與群情而偕樂

蘇軾賀立皇后表

纘女維莘倪天之妹事關廟社喜溢人神臣聞三代

之興皆有內助二南之化實本人倫維關雖正始之
風且既醉太平之福民有所恃邦其永昌恭惟 皇
帝陛下自誠而明惟睿作聖輯寧夷夏德既茂於治
朝輔順陰陽政蕪脩於內職既膺大慶益廣至仁下
逮海隅夫婦無有愁嘆上符天造日月爲之光明受
祿無疆與民同樂

王安石賀周德妃及魏國大長公主禮成表
明告治庭寵頒恩冊家邦之慶海宇以欣恭惟 皇
帝陛下荷天閔休若古不忒式自櫛率而尊祖備極靈
承謂妨親而先姑特加徽數改錫厥壤增袞所生大

號已孚庶言惟允臣父尸榮祿竊睹盛儀臚傳雖異
於九賓率舞尚同於百獸

蘇軾賀駕幸太學表

輦回原廟既崇廣孝之風幄次儒宮復示右文之化
禮行一日風動四方臣聞五學之臨三代所共蓋天
子不敢自聖而盛德必有達尊在漢永平始舉是禮
雖臨雍拜老有先王之規而正坐自講非人主之事
豈如允哲退託不能莫爵伏興意默通於先聖橫經
問難言各盡於諸儒恭惟 皇帝陛下文武憲邦聰
明齊聖大度同符於 藝祖至仁追配於 昭陵故

文編卷之九
八表
舉舊章以興盛節臣早塵法從久侍經幃永矣馳誠
想聞合語於東序斐然作頌行觀獻馘於西戎

歐陽修賀平貝州表

盜孽竊興神祇共心不憑睿筭悉殄兇徒伏惟尊
號皇帝陛下推仁育物浸澤在人常服儉以躬行惟
足兵而在念至於多山川金幣講好戎夷務休戰爭蓋
惜士卒德至深而莫報恩既厚則生驕敢肆妖狂自
干斧鉞驅脅士衆閉守城闔既違天而逆人宜不攻
而自破而况聖神運略將相協忠不遺一人咸即大
戮悖慢者警而肅恪昏愚者知有誅夷銷沮姦萌震

揚威令幸忝郡寄忻聞德音

王安石進修南郊勅式表

郊丘事重筆削才難猥以微能叨承遴選蓋聞孝以
配天爲大聖以享帝爲能越我百年之休明因時五
代之流弊前期戒具人輒爲之騷然臨祭視成事或
幾乎率爾蓋已行之品式曾莫紀於官司故國家講
燎禋之上儀而臣等承撰次之明詔迨茲彌歲僅乃
終篇猶因用於故常特剛除其紛冗恭惟皇帝陛下
下體聖神之質志文武之功嘉與俊髦靈承穹昊物
方鬯茂以薦信而無慙人具昭明知因陋之爲耻固

將制禮作樂以復周唐之舊豈終循誦習傳而守秦漢之餘則斯書也譬大輅之椎輪與明堂之營室推本知變實有考於將來隨時施宜亦不爲乎無補

王安石請 皇帝御正殿復常膳表

陽春生物偶霑澤之稍愆睿意恤民遽側身而自抑德已修於消變數或係於非常當服彛儀用安群下恭惟 皇帝陛下天仁博施神知曲成躬忘旰食之勞坐講日新之政四時協序萬物致和適當化養之辰宜得涵濡之澤少違常候深軫清衷退師氏之正朝約大官之盛饌仰窺謙德志在閱民然而遐虜來朝當即法宮之位誕辰入慶合嘯以燕俎之珍事有所先禮難偏廢伏願仰回淵聽俯徇輿情夙御九筵之居並羞十閣之具上以全於國體下以副於臣誠

第二表

時澤偶愆屢勤齋禱聖衷愈勵曲盡焦勞將損已以召休因退次而貶食列朝刻奏尚闕嗣音在臣列之靡遑伏帝閣而再扣恭惟 皇帝陛下體居離正德稟乾剛期揉俗以致康甞納隍而興念七載于此繼獲豐穰一春而來或罹愆亢皇慈深軫群祀徧修恐徃犴乖則親慮其囚懼黼黻美則躬變其服仍損內

文編卷之九
表
養之舉兼虛正宇之朝然而禮貴從宜事難泥古而况甫臨誕節交舉慶儀有列辟拜萬年之觴有殊俗修兩朝之好苟虧彝制難副群情伏望少屈淵衷特從誠懇天臨廣廈日御常珍親事法宮廓宣於政治惟辟王食昭示於等威仰以慰兩宮之慈俯以安羣下之望

王安石辭南郊陪位表

萬國駿奔焯上儀之殊觀一夫幽屏叨明命之特招伏念竊祿已多冒恩最渥自致惓惓之義實有素情再瞻穆穆之容豈非榮願而恭然暮景搜以沉痾伏畎畝以負薪於今未已作壇垓而踐豆用此爲妨

王安石辭明堂陪位表

合宮丕享寰宇駿奔冒被優詔之加使陪顯相之末伏念臣投身荒遠上負眷憐企踵禁嚴久勞監寐况宗祈之盛禮辱號召之明恩當即辨嚴豈容辭疾而沉寘浸劇黽勉實難心若子牟雖每存於魏闕身如楊僕乃自外於漢關

李密陳情表

臣密言臣以險釁夙遭閔凶生孩六月慈父見背行年四歲舅奪母志祖母劉愍臣孤弱躬親撫養臣少

多疾病九歲不行零丁孤苦至于成立既無叔伯終
鮮兄弟門衰祚薄晚有兒息外無基功疆近之親內
無應門五尺之童孺孺獨立形影相弔而劉夙嬰疾
病常在牀蓐臣侍湯藥未曾廢離逮奉 聖朝沐浴
清化前大守臣逵察臣孝廉後刺史臣榮舉臣秀才
臣以供養無主辭不赴會詔書特下拜臣郎中尋蒙
國恩除臣洗馬猥以微賤當侍東宮非臣隕首所能
上報臣具以表聞辭不就職詔書切峻責臣逋慢郡
縣逼迫催臣上道州司臨門急於星火臣欲奉詔奔
馳則劉病日篤欲苟順私情則告訴不許臣之進退

實為狼狽伏惟聖朝以孝治天下凡在故老猶蒙矜
育况臣孤苦特為尤甚且臣少仕偽朝歷職郎署本
圖宦達不矜名節今臣亡國賤俘至微至陋過蒙拔
擢寵命優渥豈敢盤桓有所希冀但以劉日薄西山
氣息奄奄人命危淺朝不慮夕臣無祖母無以至今
日祖母無臣無以終餘年母孫二人更相為命是以
區區不能廢遠臣密今年四十有四祖母劉今年九
十有六是臣盡節於 陛下之日長報劉之日短也
烏鳥私情願乞終養臣之辛苦非獨蜀之人士及二
州牧伯所見明知皇天后土實所共鑒願陛下矜愍

愚誠聽臣微志庶劉僥倖保卒餘年臣生當墮首死
當結草臣不勝犬馬怖懼之情謹拜表以聞

歐陽修乞罷政事表

臣聞士之行已所重者始終之不渝臣之事君所難
者進退而合理苟無大過善退其身昔之爲臣全此
者少臣頃侍先帝屢陳斯言今之懇誠蓋迫於此
伏念臣識不足以通今古材不足以語經綸達逢盛
際之休明早自諸生而拔擢方其與儒學文章之選
居言語侍從之流每蒙過獎於群公常媿虛名之浮
實既晚叨於重任益可謂於得時何嘗敢傷一士之

賢豈不樂得天下之譽而動皆臣思毀必臣歸人之
愛憎不應處異臣之本末亦豈頓殊蓋以處非所宜
用過其量惟是要權之地不勝指目之多周防所以
履危而簡踈自任委曲所以從衆而拙直難移宜其
舉足則蹈禍之機以身爲斂怨之府復盤桓而不去
遂謗議以交興讒說震驚輿情共憤皇明洞照聖斷
不疑孤臣獲雪於至寬四海共忻於新政至於賴天
地保全之力脫風波險陷之危使臣散髮林丘幅巾
衡巷以此沒地猶爲幸民况乎擁蓋垂檐其榮可喜
撫民求瘼所寄非輕苟可效於勤勞亦寧分於內外

伏惟 皇帝陛下曲回天造俯察愚衷許解劇繁處
之閑僻物還其分庶獲遂於安全心匪無知豈敢忘
於報效

王安石乞罷政事第二表

私懷懇至已具布聞聖訓丁寧未蒙聞納敢冒崇高
之聽再輸悃悞之情臣聞任賢之方要其有用陳力
之義止於不能苟弗集於事功且重罹於疹疾豈容
叨據以累明揚伏念臣猥以孤生親逢盛世昧於量
已志欲補於休明失在信書事浸成於迂濶每煩衆
論上恩聖聰久知素願之難諧繼以積痾而自困辭

而去位庶逃竊食之誅勉以就功重荷包荒之德雖
貪順命終懼妨功伏惟 皇帝陛下閱度并容大明
俯燭特垂矜允俾遂退藏如此則孤進之身獲全生
於末路具瞻之地得改命於時材

歐陽修亳州乞致仕第二表

臣近貢封章乞還官政伏奉詔答未賜允俞退自省
循奚勝殞越臣聞神功不宰而萬物得以曲成者惟
各從其欲天鑒孔昭而一言可以感動者在能致其
誠敢傾虔至之心再黷高明之聽伏念臣本以一介
之賤叨塵二府之聯知直道以事君每師心而自信

文編卷之九
然而既乏捐軀之効又無先覺之明用之已過其分而曾不自量毀者不堪其辱而莫知引去幸賴乾坤之再造得逃陷穽之危機仍許避於要權俾退安於晚節今乃苦於衰病莫自支持顧難冒於寵榮始欲收於骸骨敢期聖念過軫天慈謂雖迫於桑榆未忍棄於草莽竊以古今之制沿襲不同蓋由兩漢而來雖處三公之貴每上還於印綬多自駕於車轅朝去朝廷暮歸田里一辭高爵遂列編民豈如至治之朝深篤愛賢之意每示隆恩之典以勸知止之人故雖有還政之名而仍享終身之祿固已不類昔時之士

無殊居位之榮然則在臣素心雖竊退休之志迹臣所乞尚虞僥倖之譏伏望 皇帝陛下側以深仁矜其至懇俾解方州之任遂歸環堵之居固將優游垂盡之年涵泳太平之樂惟辛勤白首迄無一善之稱孤負明時莫報 三朝之德此爲慙恨何可勝陳

歐陽修蔡州乞致仕第二表

睿訓丁寧曲加慰諭愚衷懇迫尚敢黷煩將再干於冕旒宜先伏於砧鑕伏念臣世惟寒陋少苦竒屯識不達於古今學僅知於章句名浮於實用之始見於無能器小易盈過則不勝於幾覆徒以早際千齡之

亨會誤蒙三聖之獎知寵榮既溢其涯憂患亦隨而
至稟生素弱顧身未老而先衰大道甚夷嗟力不前
而難強每念恩私之莫報兼之疾病以交攻爰於守
毫之初遂决竄漳之計逮此三遷於歲律又更兩易
於州符而犬馬已疲理無復壯田疇廬甚邇今也其時
是敢更殫螻蟻之誠仰冀乾坤之洪庥况今時不乏士
物咸遂生息鴈去來固不爲於多寡少爲魚上下皆自
適於飛潛苟遂乞於殘骸庶少償其夙志伏望 皇
帝陛下哀憐舊物憫惻至仁察其素非僞之誠成
其識分知止之節曲從其欲賜報 曰俞俾其解組官
庭還車故里披裘散髮逍遙垂盡之年鑿井耕田歌
詠太平之樂其爲榮幸曷可勝陳

歐陽修蔡州乞致仕第三表

恩深煦嫗感極涕洟雖情有迫於危心不知自止而
辭已窮於累牘幾至無言惟以至誠期於必達自乞
憐於君父不復訊於著龜伏念臣家世單平性姿中
下少從宦學本免饑寒不自意於遭逢遂進階於華
顯然而群材方茂蒲柳未秋而早衰衆駿並馳駑駘
中道而先乏而况荷難勝之任用竊逾分之寵榮風
波憂畏而慮以深疾病侵凌而老亦至故自辭於機

政即願謝於軒裳蒙 上聖之至仁念 三朝之舊
物每曲煩於訓諭久未忍於棄捐竊惟臣知事君必
本忠信言不顧行是爲罔欺而臣口日誦於田間身
坐貪於祿利可畏至公之議何施有覲之顏每自省
循莫遑啓處是敢罔避再三之煩黷猶希萬一之矜
從伏望 皇帝陛下特軫天慈俯回睿聽察前言之
可復蓋屢請者有年哀下愚之不移俾卒成於素志
徇其所欲乞以殘骸臣若得上印綬於有司自架柴
車而即路晚節如無於大過沒身未荷於鴻私

王安石乞退第一表

臣忠於爲國故進而能致其身君恕以及人故病則
閔勞以事此今昔共由之通義實上下相與之至情
敢觸冒昧之誅冀蒙哀矜之聽臣受才鄙劣遭運休
明陳愚或會於聖心承乏遂尸於宰事謀謨淺拙謾
不見其有成操行陵夷又或幾於無耻久宜辭位尚
苟貪恩豈圖養拙以乖方重以瞽昏而廢務粗嘗陳
列未獲矜從黽勉以來浸淫遂劇大懼典司之曠上
煩程督之嚴伏惟 陛下詢事考言循名責實或輟
夜分之寐常臨日昃之朝萬方黎獻之多各皆祗辟
三事大夫之守豈可瘵官仰冀高明俯昭悃悞念其

服勞之久愍其搜察之深及未干鈇鉞之時令遂解
機衡之任豈特少安於私義茲惟畢協於師虞

王安石乞退第三表

聖恩所及有隆天重地之施私義未安有深淵薄冰
之懼竊惟成湯高宗之世有若伊尹傳說之臣其道
則格于帝而無疑其政則加乎民而有變后惟時又
相亦有終迨乎中世之陵夷非復古人之髣髴忠或
不足以取信而事事至於自明義或不足以勝姦而
人人與之爲敵以此乘權而又處孰能持祿以少安
此臣之慮危於居寵之時而昧死有均勞之乞况於

抱病浸以瘵官伏惟

陛下道與日躋德侔乾覆哀

一夫之失所樂萬物之皆昌矧夫眷遇之優既已勤
劬之久宜蒙善貸使獲曲全賜其疲賤之身假以安
閑之地則敝車無用猶可具於勞薪棄席未忘或再
施於華幄

王安石乞宮觀表

筋骸衰繇僅有餘生肝膈精微簡在聖聽豈圖寵獎
未賜矜從輒冒威尊更輸情素伏念臣久妨機要初
乏消塵苟免庶尤實荷恩私之至敢緣多疾更尸名
器之崇比辱使軺俯宣詔旨深惟策勵仰稱龍光而

况病瘵有加療治無損辭榮家食乃爲理分之宜干
澤自營尚恃眷憐之舊伏惟 皇帝陛下銜聽萬事
器使衆材念其黽勉之終難假以便安而少愒庶完
體力圖報毫分

王安石謝詔免南郊陪位表

螻蟻惓惓上千旒宸雲天顛顛俯貢丘園臣僊矣微
生頽然暮齒冒恩鼎食非堅卧以爲高承命旌招宜
駿奔而反後顧緣衰疾致隔清光伏蒙 陛下特赦
尤違曲垂念聽鄙昏難望尚延舜日之華荒翳曷遺
更獲堯雲之潤

歐陽修謝明堂覃恩轉官表

天地號令風雷鼓行一氣所均萬物咸被遂容僥倖
亦與褒升伏念臣材不逮人識非慮遠徒有事君之
節未知報國之方冒寵貪榮已踰其量見利臨得曾
不知慙此者伏遇 尊號皇帝陛下堯舜聰明禹湯
勤儉修前王之曠典述先志以繼成昭致精裡躬臨
路寢膺受上天之多福推與萬方而不私臣於此時
限以官守講儀制禮不預議卽博士之流助祭陪祠
不在諸侯方物之列既乏一言之獻又無執事之勞
徒隨翟閭共享餘賜普天率土難異衆以獨辭踳厚

文編卷之九
表
五
踣高但撫躬而無措

王安石謝加食邑表一

顯相郊宮固宜寵獎曠居田里乃濫褒加伏念臣尚
負宿痾久尸榮祿無可論之薄效有未報之隆恩方
國明禮庶工祇載奉璋執豆旅幣獻琛具輸奔走之
勞獨抱滯留之歎豈圖踈迭亦冒寵光此蓋伏遇
皇帝陛下荷休駿厖斂福敷錫故雖幽屏弗以遐遺
身每被於慈憐心敢勞於勤策

王安石謝加食邑表二

鮮澤幸流明綸俯被永惟叨昧深以兢榮切以時郊
丘之承所以尊上帝疇官邑之賜所以富善人盛福
靡專至恩惟稱臣父塵要近上累昭明方王輅之親
祠以銅竹付而外守逮均休慶例獲褒嘉此蓋伏遇
皇帝陛下以平施於萬方無遐遺之一物矧蒙圖任
之舊特荷獎知之深祇服訓辭敢忘報禮

王安石謝遷入東府賜御筵表

恩享不貲誠優賢之務稱頑冥無似欲報國而知難
臣等過以凡材並膺殊選久壅賢路上孤聖時伏惟
皇帝陛下謀德在容求仁以恕謂大臣方宣勞於王
室則人主當加恤其私家發使禁闈之中視圖魏闕

之下取才置臬皆斷於睿謀成事告功不煩於宰旅
重紆衡蓋周視庭除申以中人喻之良月使及日辰
之吉即于堂寢之安輟車府之傍牽載其帑重移饗
官之烹割侑以鼓歌歡更逮於適臣寵先加於小已
陰陽或謬未知燮理之方風雨其除徒賴帡幪之賜
王安石謝朱炎傳聖旨令視事表

使指遄臻訓詞俯逮敢圖衰疾尚悞眷存伏念臣曲
荷搜揚久孤付屬有能必獻未嘗擇事而辭難無力
可陳乃始籲天而求佚然方焦思有爲之日以此懷
恩未報之身苟營燕安豈免慙悸伏蒙 陛下人惟

求舊義不忘遐乃因乘詔賦命之臣更喻推轂授方
之意躋履無用誠弗忍於棄捐朽株匪材尚奚勝於
器使求惟獎勵徒誓糜捐

歐陽修謝復龍圖閣直學士表

恩還舊職事雪前誣感極心驚涕隨言出臣伏見前
世材賢之士身結主知勲德之臣功施王室然尚或
一遭謗毀欲辨無由少忤要權其禍不測顧如臣者
何足道哉臣材不迨於中人功無益於當世用之未
見有効去之無足可思矧罔極之讒交興而並進易
危之迹何恃而不顛而聖心不忘恩意特至辨罔欺

於曖昧沮仇嫉於衆多雖暫居譴謫之中而屢被陞
遷之渥今又特蒙甄錄牽復寵名以臣之愚豈比前
人而獨異推其所幸蓋由聖主之親逢謂宜如何可
以論報再念臣稟生孤拙本乏藝能徒因學古之勤
粗識事君之節苟臨危効命尚當不顧以奮身况爲
善無傷何憚竭忠而報國誓期盡瘁少答高明

歐陽修謝宣召入翰林表

使車入里君命在門閭巷驚傳豈識朝廷之故事縉
紳竦歎以爲儒者之至榮在臣之愚何以堪此竊以
文章之任自古非輕待遇寵榮至有私人之目詢謀

獻納因加內相之名恩既異於常倫人愈難於稱職
伏念臣器非宏遠識匪該明學不通古今之宜材不
適方圓之用久叨塵於侍從曾莫著於勞能而自出
守外藩近遭家禍苟存餘喘復齒周行風波流落者
十年天日再瞻於雙闕進退之際已蕭颯於霜毛慰
勞有加賜憫憐於玉色形神若此志意可知身已分
於早衰心敢萌於希進加以羈危之迹仇嫉交攻進
退動繁於羣言論議多煩於睿聽雖覆載之造每賜
保全而孤蹇偷安常思引去伏蒙 尊號皇帝陛下
俯憐舊物曲軫宸慈因內署之闕員俾備官而承乏

臣敢不勉尋舊學益勵前修感遺簪未棄之仁竭駑馬已疲之力度伸薄効少荅鴻恩

蘇軾謝宣召入院表

詔語春溫再命而僂使華天降一節以趨在故事以嘗聞豈平生之敢望省循非稱愧汗交深竊以視草之官自唐爲盛雖職親事秘號爲北門學士之榮而祿薄地寒至有京兆掾曹之請豈如聖代一振儒風非徒好爵之縻兼享大亨之養玉堂賜篆仰淳化之彌文寶帶重金佩元豐之新渥既厚其禮愈難其人而臣以空踈冗散之材衰病流離之後生還萬里坐

閱三遷不緣左右之容躡處賢豪之上此蓋伏遇

皇帝陛下生資文武天祚聖神雖亮陰不言尚隱高宗之德而訪落求助已啓成王之心首擇輔臣次求法從知人材之難得采虛名而用臣敢不益勵初心力圖後效才不逮古雖慙內相之名志常在民庶免私人之誚

蘇軾謝除侍讀表

北門視草已叨儒者之極榮西學上賢復玷侍臣之高選省循非稱愧汗交懷竊惟講讀之臣止以言語爲職考功課吏無殿最之可書陳善閉邪有膏澤之

潛潤豈臣愚陋亦所克堪此蓋伏遇 太皇太后陛下
憂思深長德業久大受 先帝投艱之託爲神孫
經遠之謀故選左右前後之人罔非吉士使知興亡
治亂之效莫若多聞謂臣雖無大過人之才知臣粗
有不欺君之實故使朝夕與於討論奉末日之清閑
未知所報畢微生於盡瘁終致此心

王安石謝知制誥表

高華之選欲報嘗艱固陋之身以榮爲懼切以自古
招智能之士因使爲侍從之臣豈特賴其虛名謂能
華國蓋將收其實用相與致君矧號令文章之爲難

而討論潤色之所寄苟以失職不稱則爲時起羞伏惟
皇帝陛下躬上聖之容只撫久安之運趨時有救弊之
急守器有持盈之難當得俊良使陪遺忘則典司明
命出入禁門一有瘵宮尤爲累上臣羈單賤士鄙朴
常人仕初有志於養親學遂不專於爲己比更煩使
稍竊謬恩內懷尸祿之慙仰負食功之意又蒙採擢
以至超踰蓋君之視臣不使同犬馬之賤則下之報
上亦欲致岡陵之崇况臣少習藝文粗知名教遭逢
一旦度越衆人唯當盡節於明時豈敢止懷於私計

蘇軾謝復官提舉王局觀表

七年遠謫不意自全萬里生還適有天幸驟從縲紲
復齒縉紳伏念臣才不逮人性多忤物剛褊自用可
謂小忠猖狂妄行乃蹈大難皆臣自取不敢怨尤會
真人之勃興與萬物而更始而臣獨在幽遠最爲冥
頑迨茲起廢之初倍費生成之力終蒙記錄不遂棄
捐此蓋伏遇 皇帝陛下正位龍飛對時虎變神武
不殺孰非受命之符清淨無爲坐獲銷兵之福聰明
不作邪正自分使臣得同草木之微共霑雷雨之澤
臣敢不益堅素守深念往愆沒齒何求不厭飯蔬之
陋蓋棺未已猶懷結草之忠

歐陽修南京留守謝上表

守宮鑰之謹嚴敢忘夙夜布政條之緘悉上副愛勤
寄任非堪兢營並集伏念臣賦材庸薄稟數竒屯毀
譽交興兩嘗過實寵榮踰分動輒招尤念報效之未
伸敢不竭忠而盡瘁因風波之可畏則思遠去以深
藏迨此六年外更三守學偷安而杜口負素志以媿
心朽質易衰已凋零於齒髮良時難得尚希慕於功
名豈謂皇慈未捐舊物擢從支郡委以名都惟此別
京舊當孔道簿領少勤於職事厨傳取悅於路人苟
循俗吏之所爲雖能免過非有古人之大節未足報

君

歐陽修亳州謝上表

貳政非才雖獲奉身而退分符善地猶懷竊祿之慚
祇荷寵靈惟知戰懼伏念臣章句腐儒之學也豈足
經邦斗筭小器之量也寧堪大用而叨塵二府首尾
八年荷三朝之誤知罄一心而盡瘁若乃樞機宜慎
而見事輒言陷穽當前而橫身不避竊尋前載未有
能全一昨怨出仇家構爲死禍造謗于下者初若含
沙之射影但期陰以中人宣言于廷者遂肆鳴梟之
惡音孰不聞而掩耳賴聖人之在上廓日月之至明

悉究罔誣遂投讒賊再念臣性實甚愚而踈於接物
事多輕信者蓋以至誠如彼匪人失於泛愛平居握
手惟期道義之交延譽當朝常丐齒牙之論而未乾
薦禰之墨已彎射羿之弓知士其難世必以臣爲戒
常情共惡人將不食其餘而臣與遊既昧於擇賢在
滿不思於將覆自貽禍釁幾至顛躋上煩睿聖之保
全得完名節於終始洎懇辭於重任尤深惻於皇慈
雖避寵辭隆僅能去位而清資顯秩愈更叨榮莫逃
僥倖之譏實負心顏之醜斯蓋伏遇 皇帝陛下乾
坤大度堯舜至仁察臣自取於怨仇本由孤直憫臣

力難於勉彊蓋迫衰殘既獲免於非辜仍曲從於私
欲遂同萬物俾無失所之嗟未盡餘生敢忘必報之
効

王安石江寧府謝上表

稽違詔令經涉歲時 先帝登遐既不獲奔馳道路
陛下即位又未嘗瞻望闕廷所憂後至之刑誅敢異
就加於官使雖知黽勉尚懼煎瘳蓋聞因任以責羣
材厚省以通衆志厥或抱能而可用則雖負疾而見
容如臣者逮侍 先朝叨官外制惓惓許國雖有愚
忠役役隨人但尸榮祿銜哀去位嬰疹彌年望絕龍

光分投冗散伏遇 皇帝陛下紹膺尊極俯燭幽微
延之以三節之嚴付之以十城之重比緣禋祀特有
褒封申命曲加因郵併賜唯是土風之美素無犴獄
之煩又寄託於丘墳粗諳知其間里念雖閉閣殆弗
廢於承流以比造朝或未妨於養疾矧恩勤之已迫
且遜避之不容敢不少嘗體力之所任祇奉詔條而
爲治冀逃大戾仰稱殊私

王安石謝賜第安國及第表

雋乂之求外覃草野龍光之施首逮門庭切以躬國
論聽斷之煩而察知孤遠之行略門資貢舉之法而

拔取滯淹之才山林之所誦說而難遭閭巷之所驚
嗟而罕見伏惟 皇帝陛下協德穹昊比明羲皇博
臨四方洞照萬物如臣同產爲世畸人少遭閔凶自
奮寒苦雖強學力行粗有時名而少偶寡徒幾絕祭
望豈期聖聽俯及幽潛遂使窮途坐陞華寵獎以詔
書而試藝賜之科第而命官祿不逮親旣求垂於養
志仕非爲已當共誓於捐軀

王安石謝男雱除中允說書表

恩驟加於私室多所超踰事或累於公朝誠難冒昧
仰煩睿訓曲喻至懷求惟眷獎之殊實重兢慙之至

伏念臣首叨召節得侍詞林隨被贊書使陪經幄稍
更歲月莫補消埃竊觀上智之日躋內訟淺聞而知
困况如賤息厥有童心尚迷鑽仰之方豈稱招延之
禮恕已量主非敢以私而自嫌爲官擇人顧雖成命
而宜改輒布可辭之義上干難犯之威伏惟 皇帝
陛下屈體優容垂精寵荅謂大人照臨之道廣當養
以蒙意小夫誦說之智專遽忘其賤褻稱備厚訓飭
加嚴揣實未安寄顏有慙重念自古君臣之相與未
有如臣父子之所遭蓋當用儒之時尤難講藝之職
典謨方御實參備於討論誥誓未終已繼叨於獎擢

獲世官於問巷嗣家學於朝廷自非忘軀何以報國知人而官以哲慨已誤於明揚委質而教之忠誓永肩於素守

蘇軾謝賜曆日表

歲頒正朔蓋春秋統始之經郡賜璽書亦漢家寬大之詔實爲令典豈是空文伏以望歲者生民之至情畏天者人君之大戒所以常言報應而不言時數每奏水旱而不奏嘉祥上有消復之心下有燮調之道固資共理同底純熙恭惟皇帝陛下祇敬三靈憂勤萬宇爲仁百世自然天下之歸教民七年豈無善

人之效臣敢不仰遵堯典寅奉夏時謹隄防溝洫之修行勞來安定之政庶殫綿力少助至仁

曾鞏謝元豐元年曆日表

一遠闕庭十移星曆顧彫零於齒髮無報補於毫分伏惟皇帝陛下叙大禹之九疇齊有虞之七政陰陽寒暑罔不若時草木昆蟲舉皆遂性循用頒正之典寵詒分土之官臣幸備守藩預聞告朔去親方遠已驚駕歲月之新許國雖堅更嘆功名之晚惟體在民之意庶禔及物之仁

歐陽修謝賜漢書表

俯躬承命拭目生輝竊以右文興化乃致治之所先
著錄藏書須太平而大備惟漢室上繼三代之統而
班史自成一家之書文或舛訛蓋其傳之已久詔加
刊定俾後學之無疑一新方冊之文增煥秘書之府
而奏篇之始方經衡石之程賜本之榮惟及鈞樞之
近敢期孤外特與恩頒此蓋伏遇 皇帝陛下曲軫
睿慈俯矜舊物謂其嘗與臣隣之列不忍遽遺憐其
自喜文字之間俾之娛老然臣兩目昏眊雖嗟執卷
之已艱十襲珍藏但誓傳家而求寶

蘇軾謝賜對衣金帶馬表

服章在笥音 草木何知冒慶雲之渥采魚蝦至陋
有待天地無 草木何知冒慶雲之渥采魚蝦至陋
借滄海之榮光雖若可觀終非其有妻孥相顧驚屢
致於匪頒道路竊窺或反增於指目此蓋伏遇 太
皇太后陛下聰明齊聖陳錫載周含垢匿瑕而察於
求賢卑宮菲食而侈於養士士豈輕於千里念非其
人言有重於兼金當思所報

王安石謝賜對衣鞍馬表

出大庭之顯服束以精鏐引內廐之名駒傳之錯采
隆恩所逮朽質知榮竊念臣弱力淺聞久憂積疹中

預從官之選外分守將之權僅免譴訶更蒙牧召論
思潤色曾莫效於微勞衣被服乘乃前叨於異數此
蓋伏遇 皇帝陛下醲於慶賞詳在招延因示眷懷
使知奮勵誓竭愚忠之報異無虛授之嫌

歐陽修謝擅止散青苗錢放罪表

有罪必誅是爲彝典原情以恕特出深仁聞命驚慚
省躬涕泗伏念臣以一介之微賤荷 三聖之獎知
寵祿旣豐初無報効筋骸已憊尚此遲徊曲蒙大度
之并容誤委一方之寄任職當撫俗責在分憂方茲
旰昃之勞心豈敢 因循而避事昨遇國家新建官司

而主計大商財利以均通分命出使之車交馳於郡
縣悉發舊藏之錙取息於農氓而臣方久苦於昏衰
初莫詳其利害旣已大誼於物議始知不便於人情
亦嘗略陳衆弊之三冀補萬分之一屬再當於班給
顧已逼於會期雖具奏陳乃先擅止據茲專輒合被
譴呵豈謂伏蒙 皇帝陛下深軫睿慈俯矜朴拙免
從吏議特貸刑章夫何草木之微曲被乾坤之施臣
敢不益思祗畏更勵操修戒小人之遂非希君子之
改過冀圖薄効少答鴻私

蘇軾謝失覺察妖賊放罪表

盜發所臨守臣固當重責罪疑則赦聖主所以廣恩
自驚廢逐之餘猶在愍憐之數伏念臣早蒙殊遇擢
領大邦上不能以道化民達忠孝於所部下不能以
刑齊物消姦宄於未萌致使妄庸敢圖僭逆原其不
職夫豈勝誅况茲溝瀆之中重遇雷霆之譴無官可
削撫已知危至於捕斬羣盜之功乃是鄰近一夫之
力靖言其始偶出於臣雖爲國督奸常懷此志而因
人成事豈足言勞勉自列於涓埃庶少寬於斧鉞豈
謂蕩然之澤許以勿推收驚鬼於散亡假餘生之晷
刻退思所自爲幸何多此蓋伏遇 皇帝陛下舞虞

舜之干示人不殺祝成湯之網與物求生其間用刑
本不得已稍有可赦無不從寬務在考實而原情何
嘗記過而忘善益悟向時之所坐皆是微臣之自貽
感愧終身論報無地布衣蔬食或死於饑寒石心
木腸誓不忘於忠義

蘇軾杭州謝放罪表

臣近以法外刺配本州百姓顏益二人上章待罪奉
聖旨特放罪者職在承宣當遵三尺之約束事關利
害輒從一切之便宜曲荷天慈不從吏議伏念臣早
緣剛拙屢致憂虞用之朝廷則逆耳之瘞形于言施

文編卷之九
八表
三十四
之郡縣則疾惡之心見于政雖知難每以爲戒而臨
事不能自回苟非日月之明肝膽必照則臣豈惟獲
罪於今日久已見傾於衆言恭惟 皇帝陛下濬哲
生知清明旁達委任羣下退託於不能愛養成材惟
恐其有過知臣欲去一方之積弊湏除二猾以示民
特屈憲章以全器使臣敢不省循過咎祇服簡書眷
此善良自不犯於漢法時有貸捨用益廣於堯仁

又謝太皇太后表

亂羣之誅不請而決蓋恩威之無素致姦猾之敢行
方俟譴呵豈期寬宥伏以法吏網密蓋出於近年守

臣權輕無甚於今日觀 祖宗信任之意以州郡責
成於人不擇師帥之良但知繩墨之馭若平居僅能
守法則緩急何以使民顧臣不才難以議此恭惟
太皇太后陛下寬仁從衆信順得天推一身之至公
納萬方於無罪而臣始終被遇中外蒙恩謂事有專
而合宜情無他而可恕故加貸捨以示寵綏朝廷之
明粗以臣爲可信吏民自服當不令而率從

